

四庫全書

史部

欽定四庫全書

唐大詔令集卷一百

宋 宋敏求 編

政事

官制上

致仕官在見任官上詔

定三品至九品服色詔

置三師詔

釐革伎術官制

擇揀刺史詔

令御史錄奏內外官職事詔

命新除牧守面辭勅

誠百官與供奉人交通制

誠勵御史制

簡京官為都督刺史詔

復置十道按察使勅

誠勵尚書省官勅

洗滌官吏員犯勅

誠勵諸州刺史詔

刺史令久在任詔

京官都督刺史外選用勅

誠勵吏部兵部禮部掌選知舉官勅

誠勵兵吏部兩司勅

置十道採訪使勅

處分縣令勅二道

處分選人勅

吏部引見縣令勅

官制上

致仕官在見任官上詔

尚齒重舊先王以之垂範還章解組朝臣於是克終釋  
菜合樂之禮東膠西序之制養老之義遺文可覩朕恭  
膺大寶憲章故實永言遺事彌切深衷然情存稽古踵

世澆季而策名就列或乖大體至若筋力將盡桑榆且迫徒竭夙興之勤未悟夜行之罪其有驚心止足行堪激勵謝事公門收骸閭里能以禮讓固可嘉焉内外文武羣官年在致仕抗表去職者朝叅之班宜在見任官

上

貞觀二年九月

定三品至九品服色詔

車服以庸昔王令典貴賤有節禮經彛訓末代澆浮采章訛雜卿士無高卑之序兆庶行僭侈之儀遂使金玉

珠璣靡隔於工賈錦繡綺縠下通於皂隸習俗為常流  
遁忘反因循已久莫能懲革朕繼踵百王欽承寶運思  
弘典制垂範後昆永鑒前失義存釐改其冠冕制度已  
載令文至於尋常服飾未為差等今已詳定具如別勅  
宜即頒下咸使聞知

貞觀四年八月

置三師詔

朕觀前代明王聖主曷嘗無師傅哉況朕踵百王之末  
智不周物其無師傅何以匡朕之不逮詩不云乎不愆

不忘率由舊章宜依古道置三師之位

貞觀六年二月

### 釐革伎術官制

量才授職自有條流常秩清班非無差等比來諸色伎術因營得官及其升遷改從餘任遂使器用紕繆職務乖違不合禮經事須改轍自今本色出身解天文者進轉官不得過太史令音樂者不得過大樂鼓吹署令醫術者不得過尚藥奉御陰陽卜筮者不得過司膳寺諸

署令

神功元年閏十月



揀擇刺史制

朕聞彰善癉惡有國之常典糾寬濟猛為政之通規朕以薄德謬膺明命瞻言賞罰未適時宜致使億兆未安賢良未進小人未退貪吏未懲亡流者未歸懷寬者未理倉儲府庫未免其空卿士大夫未任其職在予之責有愧良深然不能致君於堯舜者亦羣公卿士之所耻也今當勵精為改革弊創業卿等將何以規補致使咸亨各以狀聞朕當親覽且共理天下者在良二千石宜

令中書門下於外內官內揀擇必取才望兼優公清特著可以宣風導俗者具以名聞但有司承寬共為苟且事多憊咎無復紀綱各令本司長官審善惡有才職不相當限十日進狀

景雲元年十一月

### 令御史錄奏內外官職事詔

寅亮天功弼諧庶績宰臣之任也彰善癉惡激濁揚清御史之職也政之理亂寔此由焉朕丕膺鴻緒三年於茲日旰而食夜分而寢萬乘非樂四海為憂思欲小康

蒸人允答羣望懲勸之詔歲月相仍然耳不聞彈劾之聲目未觀剛正之舉豈内外吏咸未徇公耶將有司迴避隱不聞耶每念於此怒焉如疚言而不行責在薄德知而不奏誰其過歟御史等不樹紀綱合從屏黜但緣未親處分志在含忍宜許自新以收後效内外文武官有老弱疾患貪暴侵漁不舉職事材職不相當者三日內各錄狀進外州刺史上佐多不簡擇内外之職出入須均京官中有才幹堪理人者量與升官有清慎者與

京官

景雲二年十月

命新除牧守面辭勅

勅自古帝王莫能獨理爰樹侯伯所以分政則今刺史  
是已益欲亭之毒之納於富壽不夭不札以致和平朕  
受天眚命作人父母殷鑒遠圖罔知攸濟頃者都督刺  
史惟良是求而寂寞厥聲孰副虛想豈六條察舉未詢  
事以考言將三載黜陟不責寔而求當遂令進之則易  
吏煩於送迎退之則難人務於苟且豈所謂安孤老長

子孫之意耶漢宣由是興言劉廣為之長歎誠有旨也  
今事謀伊始邦政維新俾凝庶績思改前弊自今以後  
都督刺史每欲赴任皆引面辭朕當親與疇咨用觀方  
畧至任之後宜待四考滿隨事褒貶與之改轉諸州上  
佐五品以上應改轉限亦宜准此夫類其才則適用久  
其事則有恒致用執恒未聞不至於理也凡爾在位可

弗勉哉

先天二年七月二十四日

誠百官與供奉人交通制

勅朕聞事君者必在至公行已者貴於獨立如聞供奉  
近侍之輩比日因循廣有招攜未能周慎爰與朝列頗相  
闢茸苟非親表不合數至門庭多行請託便涉趨附眷  
言此弊須革前非宜體朕懷深自戒勵自今以後百官  
輒不得與入內供奉人往還

### 勅勵御史制

勅御史之職邦憲是司先正其身始可行事當須舉直  
錯枉不避親讎糾慝繩違務從公正如聞憊過陰自鼓

金史卷一百一  
卷一百  
動不即彈射自樹恩私曾無忌憚仍有請託將何以寄  
之鷹隼用屏豺狼如此當官深負所委自今以後不得  
更然

簡京官為都督刺史詔

朕聞天為大者孰先於育物最靈者莫甚於愛人故樹  
之后王以康兆庶朕緬鑒前烈深惟遠圖懼德之不修  
化之未偃寅畏夙夜如臨泉壑然則疇咨命於四岳黜  
陟存乎三載既已百姓為心非以一人獨理今之牧守

古稱侯伯賢者任之則循良之迹著不賢者任之則愁  
苦之聲作每冀精於所擇委之俞往豈時或頽靡苟且  
尚多吏之殊尤寂寥不嗣靜言政要朕用憮然間歲水  
旱周於郡國倉廩不蓄閭閻薦饑加以出攝頗多冗官  
增弊至於處置皆憑刺舉當於京官內簡宏才通識堪  
致理興化者量授都督刺史等久在外藩頻有進狀者  
量授京官使出入常均永為恒式課最超等必議升遷  
循默守常必加黜免昭昭賞罰可不慎歟昔國僑相鄭



以致和平曹參相齊貴於清淨清淨則不擾不擾則和平和平則不爭不爭則知耻愛費而與休息除煩而從簡易自當農者歸畝蠶者勤紡績既富而教乃克有成道德齊禮不遠斯復庶幾在位弘朕此心焉

開元二年正月

### 復置十道按察使制

古者聖王協和萬邦疇咨四岳柔遠能邇明目達聰以變於人也自朴散醇醕割方四直失於德者格之以禮失於禮者助之以刑故懼羅網而畏簡書必振其綱而

操其柄庶乎政之要也間歲天下諸州岳牧先充本道按察誠以今之刺舉昔之連率蓋欲為吏之黜陟以審人之愁苦中念作姦犯科獲罪相次棄木或尤於拙匠採薪不遺於下體由是申命有司咸多叙用至於按察暫令休罷夫泉有魚矣雖見則不祥林有獸焉而為之不採與其存而勿用孰若狎以玩之俾入於時復修其銀青光祿大夫政益州大都督府長史姚雋處置兵馬使上柱國兗國公陸先等早蘊宏量深甄大體清能勵俗仁以維風必將檢馭權豪昭明淑慝宜

興化以樹善佇責成而求當可依前件餘各如故一事以上  
並准舊例處分本道所隸之州有偏遠不穩便者仍令所司  
量宜分割永為定額訖奏聞主者施行

開元二年  
閏二月

誠勵尚書省官勅

尚書禮閣國之政本郎官之選寔藉良才如聞諸司郎  
中員外怠於理煩業維養望凡厥案牘每多停攤容縱典  
吏仍有貨財欲使四方何以取則事資先令義在能改  
宜令當司長官殷勤示語并委左右丞勾當其有與奪

不當及稽滯稍多者各以狀聞

開元二年六月

### 洗滌官吏負犯制

黃門朕聞顏回知過不無過也蘧瑗知非不無非也孔子曰過則勿憚改過而能改善莫大焉此則古之賢人所未能免朕祇膺駿命光闡鴻猷思革頽風以清貪吏作程者不要於密貴於必行行令者不要於嚴貴以適中比歲或使者廉按或憲司繩糾未能發明大體頗亦委曲小疵殊異恢恢之言遂行察察之事一從過誤永點曩倫銓管不許

其棄瑕簿書寧容其刷耻懷才則每歲見斥登用則終身  
蔑聞靜言思之誠未為得夫學以從政祿以代農不可易業從  
政不可紊序永鑒前弊當無廢人改而更張朕之志也官人負  
犯經洗滌赦宥者宜並除痕選用量舊資依選例處分諸使  
通狀事或有枉斷豈無失承前要須却累通狀人當始為雪  
各懼罪及致有寃人其訴枉屈人任申牒刑部事狀似枉者  
為牒本使勘問盡其道理無本使者追本案為其尋究應  
雪者本司斷後委左右丞更審詳覆然後牒所由司除痕

并牒紫微黃門附簿諸處百姓若被勾徵使人貪功既不納理州縣承勅又不敢放或已輸已役重被徵收或先死先逃勒出鄰保欲令貧弱何以安存自今以後有隱欺須勾者宜勾當年若事連去年者亦通任勾隔年以去更不在勾限其官典及前官隱贓在腹內者不在此例布告天下咸使聞知

開元四年四月四日

誠勵諸州刺史詔

朕聞御寰瀛者不可以乖化養黎獻者必存於從理故

專一方親百姓有愁苦之聲非牧伯之德所以精求臺閣歷選縉紳常舉百寮之要以光出刺之重虛想佳政用成庶績自冬入計者則循名責實詢事攷言雖無等差終未有殊異得非歲時或淺風教未洽耶故一切不遷各再臨所典至於敬耆老恤貧弱止奸盜伏豪強人不忍欺吏不敢犯田疇開墾獄圉空虛徭賦必平逋逃自復門杜請謁庭無滯留若是者迺聞舉職思可以力致至於弭災膏集休祥尚德義崇禮樂儒風大長化道

旁流耕夫克讓織婦知節草木不夭昆蟲咸遂扇彼淳  
源登茲壽域若是者亦弘之在我仁遠乎哉豈惟祿秩  
就加當以公卿入拜其或靡副朝獎不恭朕言陟既有  
之黜故宜及勉旃俞往各勤我之休命

開元五  
年七月

### 刺史令久在任詔

與我共理惟良二千石久於其政然後可化成前代以來頗  
多僥倖但因入考即有改轉自今以後非灼然應黜陟者  
更無遷易敦此風俗冀革苟且又舊例別駕皆是諸親



頃年以來頗多餘色先授者未能頓已此後自循舊章去冬有因計入朝不可更令却往過事考了並量材叙用

開元六年二月

京官都督刺史中外選用勅

勅刺史古之通侯公卿國之重任百揆時叙必在得賢萬邦咸寧期於共理郎官出宰抑惟前事方伯登台聞之往躅頃來朝士出牧例非情願緣沙汰之色或受此官縱使超資尚多懷耻亦有朝廷勲舊鑿鎮外臺却任京都無辭降屈且希得入衆以為榮為官擇人豈合如

此自今以後諸司清望官闕先於牧守內精擇都督刺史却向京官中簡授其臺即以下除改亦於上佐縣令中通取俾中外迭用賢良靡遺庶績其凝九功惟允即宜銓擇以副朕懷

開元八年七月

誠勵吏部兵部禮部掌選知舉官勅

孫逖

勅官邪則敗國賞僭則利淫自昔至言政之明誠朕祇膺大寶豈忘兢惕臨御以來且踰二紀期大道之成化冀天下之為公凡百卿士豈不協力而選舉之司委任

尤重若名器失序則勸沮何施近者流外銓曹頗多踰  
濫有塵清議寔紊彞章胥吏之徒雖則微賤仕進之路  
終為厥初必澄源流無雜涇渭不慎於細其傷則多小  
既不可不懲大亦不可不誠其吏部兵部禮部掌選知  
舉官等各宜飭勵當盡至公必須杜邪枉之門塞請託  
之路何止一變仍圖永清且銓綜九流必仗賢俊取諸  
賞鑒立斷可知何至淹時致稽團奏開門之後餘甲未  
終既滯官曹長前罪過舊選未畢新格復修此乃因循

實為煩弊自今以後吏部選人三月三十日以前團奏  
事畢兵部二月內畢其流外銓及武舉專委郎官恐不  
詳悉共為取捨適表公憑每至留放之時皆就尚書侍  
郎對定既上下檢察庶在得人而覆車尚存殷鑒非遠  
法不可廢宜識朕懷

誠勵兵吏部兩司勅

勅設官分職將以奉法禁非實在上下叶心中外一德  
共熙庶績用絕姦源如聞百司頗皆寬縱遂令胥吏得

以挾私近者兵部令吏因令推鞠或在選曹增減文狀  
雖小人之過則惟其常永言在司官亦為疎畧朕今申  
之寬宥許以自新庶觀將來冀能効節至如兵吏兩司  
是掌衡鏡進趨者非一揆姦巧者亦百端推而言之或  
所未免無謂幽昧朕皆察焉宜各盡心靖恭爾位

置十道採訪使勅

張九齡

勅歲比不登人或流冗言念菜色朕用疚懷而牧宰是  
寄惠養猶缺黎元為本賦歛未均當宁思之良所於邑

且十道為率六察分條周漢以還事有因革帝王之制  
義在隨時其天下諸道宜依舊逐要便置使令採訪處  
置若牧宰無政不能網理吏人有犯所在侵漁及物土  
異宜人情不便差科賦稅量事取安朕所責成貴在簡  
要其餘常務不可橫干其便宜令中書門下即簡擇奏

聞朕將親覽

開元二十二年  
二月十九日

處分縣令勅二道

張九齡

勅旨語諸縣令等自古致理其在命官今之所切莫如

守宰朕每屬意尤重此官有善者雖遠必升無能者縱  
近而廢固已維取才寔非務官資事亦坦然天下所見  
而浮競之輩未識朕懷俾其宰邑便為棄地或以煩碎  
而不專意或以僻遠而不畏法侵染成俗妨奪為恒噉  
噉下人於何寄命朕所以寢興軫念思有以濟之故令  
吏曹精選才幹卿等各膺推擇用簡朕心若能化績有  
成聲寔相副朕必有超擢終不食言如其謂人不知唯  
利是視徒速負敗兩喪身名智者所圖應不至是各宜

勉勵以副勤屬

開元年

又

勅新除河南府宓縣令張稷等令長之任黎庶尤切比  
嘗選衆未盡得人然而勇進之流乃非其好矯弊之政  
豈無所革令既各膺獎用當盡良能周月有成聲謠若  
著所列清要唯待才賢既爾有聞不患無位各宜勉勵

以副朕心

開元年

處分選人勅



勅朕憫茲下人不忘鑒寐庶乎富教寄在牧宰所以推  
擇才能親加考覈卿等各膺時用副朕虛求亦既得人  
佇聞佳政若能精銳為理聲績有稱即當待以不次信  
斯言之可復如其政不能舉行且有遺豈獨敗於厥躬  
必將坐於舉主此亦明訓不得不然各宜勉之以成名  
節今賜卿少物各宜領取並於朝堂坐食食訖好去  
年

開元

吏部引見縣令勅

唐虞致理命以子男周漢建官間以令宰朕稽古前哲  
寤寐全才委之銓衡慎擇銅墨至於上敷朝政下安淳  
人親其農桑均其力役使惇嫠者視之猶父母俾匱乏  
者賴之以安全然後八使類能六條舉最擢以含香粉  
署獎以秋簡霜臺是乃立身効官移忠入仕榮家報國  
豈不美歟若徇己冒私擾人敗政有懷潤屋無懼害公  
豈唯刑網貽憂抑亦名節隳替蓋士君子之不取亦名  
教之罪人鴻漸於盤豈不勉哉今卿等將欲赴官朕之

所言提撕之耳所謂聽訟吾猶人也必也使無訟乎況  
今之人也與古人不殊今之官也與古官無別則穀璧  
銅印其猶昔榮而卓茂魯恭迥然無繼將獎勸之道不  
致豈淳朴之風未還撫事君臨載深惕厲今者庶乎卿  
等能副此心賞既超倫刑必當法各宜自勉敷我皇猷  
無謂益高四聰必達並即於朝堂坐食食訖好去  
天寶十三  
載五  
月

唐大詔令集卷一百

# 欽定四庫全書

史部

唐大詔令集卷一百一十五

詳校官編修臣范來宗

編修臣裴謙覆勘

總校官編修臣倉聖脉

校對官學正臣常循

謄錄監生臣甯汝櫺

欽定四庫全書

唐大詔令集卷一百一

宋 宋敏求 編

政事

官制下

改太史監為司天臺勅

加散騎常侍員品詔

升中書門下品秩詔

減京畿官員制

停河南淮南等道副元帥制

減京兆尹以下俸錢制

減刺史縣令錄事叅軍詔

處分別駕令錄勅

復先減官員勅

賜常叅官錢勅

置上將軍及增諸衛祿秩詔

朝臣薨卒給俸料賻贈詔

罷百官正衙奏事勅

停河南水陸運使等勅

停諸道度支營田使勅

停宰臣監搜詔

條貫兩省臺官導從詔

釐革選人勅

文武官叅用詔

官制下

改太史監為司天臺勅

建設邦都必資懸象分別曹署皆應物宜靈臺二星主  
觀察雲物天文正位在太微西南今興慶宮上帝庭也  
考符之所合置靈臺宜取永寧坊張守珪宅以充司天  
臺所司量事修理

乾元元年二月

加散騎常侍員品詔

朕欲左右有人朝夕進善發自中禁刑於四方獻替於可



否之間論思於密勿之際通天下之志斷天下之疑作而行之道不遠矣與我共此者唯左右常侍乎散騎之班日親帷幄切問近對之地文章侍從之臣賢不厭多才不厭盛寔將助益廣以置官重其任者崇其位勸其善者厚其祿中書門下省各加置散騎常侍四員其官並為正三品祿俸之外優給雜料仍委中書門下商量處分必求望寔以寘周行臣哉鄰哉汝為汝翼慎茲高選副朕意焉

升中書門下品秩詔

春秋以九命作上公而謂之宰則宰臣者三公之職漢制中書令出納詔命典樞密侍中上殿稱制叅議政事魏晉以還益重其任職有分於公府事不綜於尚書雖出納啟沃之謀未專宰相之稱所以委遇斯大品秩非崇至於國朝寔執其政當左輔右弼之寄總代天理物之名典領百寮陶鎔景化豈可具瞻之地命數不加固當進以等威副其位望侍中中書令宜升入正二品門下中書侍郎歷代清貴所掌要重多用此官叅於樞務以

地則密以階未峻宜升入正三品式存班制永作典常  
其見任官宜依新升官品

減京畿官員制

夫計人而置官度事而賦任因時立制損益在焉吏足  
以理人人足以奉吏則官稱其事祿當其秩然後上下  
相樂公私不匱昔光武時及魏太和中並減吏員兼郡  
邑致理之道此其一隅今連歲戎旅天下凋瘵京師近  
甸煩酷尤重比屋流散念之惻然人寡吏多困於供貢

欲其蘇息不可得也設令廉耻守分以奉科條猶有祿廩之煩役使之弊而況貪猾縱欲動踰典章作威以虐下厚歛以豐已者乎古者惟置縣大夫一人牧養百姓奚必貳佐分掌而後理耶且京畿戶口減耗大半職員如舊何以堪之豈可以重困之人供不急之吏使人不倦其在變通制事之宜長安萬年各減丞一員尉兩員昭應減縣丞一員主簿一員尉兩員好時同官義原各減丞一員尉一員其所減官據闕便停如無闕簡擇勒

停應得減官委吏部條件處分

停河南淮南等道副元帥制

常袞

勅古者分建戎號以張威武必因事而制亦有時而戢以天下征伐之重方鎮之大宜有總一則以元老撫和之乃者國家平定之後復理之始與其休息則以諸侯訓緝之自河之南至於滄海往屬難故久勞師徒連城之鎮累百授鉞之將十數主其經畧委在台臣號令耳目以之咨稟服柔滅叛罔不肅清今萬里無塵思解戎

備況分閭之重各任勲賢悉心憂國所統皆理何必更有所屬適重其煩軍書取決又失要會息人罷鎮誠亦便之河南淮南西山南東等道副元帥宜停其兵馬宜充東都留守兵馬張延賞宜權知東都留守事常休明宜充副留守兼東都鎮守兵馬使

減京兆尹以下俸錢制

常衮

勅輦轂之下封畿之內承前戶口五千餘萬京兆祿廩不過二百石俸錢不過三十貫降至下吏差次可知自

頃艱虞且踰星紀歲有事邊之役人多盡室之行閭井  
蕭然百不存一而府縣之俸十倍平時官署因其使名  
數處讀位卑者假以職掌恣加優給致令所典之務移  
在他曹雖齊等倫頓異豐薄皆是常稅之外重歛而供  
侵弊則多因循未改減我軍國之用困其疲耗之人豈  
計人置官之意度農制祿之法也四方取則其若是乎  
比下詔書務於勤恤將求致理切於澄源遂委中書門  
下條錄奏聞朕躬親括巨細精詳覽其名實之狀深歎

過差之極革其既往制在惟新爰據高卑以之均節使人足以奉職吏足以資家務有不急悉皆除去仍量開劇權省官員胥徒廨役亦有蠲減費用既少困窮自安唯出正租更無徵率其京兆府官及縣官月俸除正斷外不得輒有增加如判司叅軍丞簿尉等有犯科錄事叅軍及縣令如令長及錄事叅軍及少尹有犯坐京尹畫一之令當在必因勸百之義固非末減各儆於位無近於刑



誠刺史縣令錄事叅軍詔

楊炎

勅旨弛張刑政興化阜俗使吏息貪汚之跡下無愁怨之聲者不惟良二千石亦在郡主簿縣大夫親其教訓舉其綱目條察善惡惠養困窮方伯得以考其殿最故漢置刺史臨課郡國周制官刑糾繩邦理其義明矣朕思舉舊典以清時俗頻詔長吏精擇此官如聞近日猶有奸濫或未習政事素無令聞因依請託尸曠祿位邪枉附法悞局廢官人弊於下怨歸於上閭井減耗賄政

日聞豈所謂建明職守共副憂勤者也又別駕秩位頗  
崇若郡守廢闕掌同其任舊制補署或匪其才一不稱  
職則多傷害自今以後別駕縣令錄事叅軍有犯賊私  
及暗弱老耄疾患不稱所職戶口流散者並委觀察節  
度等使與本州刺史計會訪察聞奏與替其犯賊私者  
便禁身推問具狀聞奏其疾患者准式解所職老耄暗  
弱及無贓私才不稱職者量資考改與員外官餘官准  
前後勅處分其刺史不能覺察仰觀察節度使具刺史

名品間奏如觀察節度管內不能勾當即官御史出入  
訪察間奏

處分別駕令錄勅

文同上篇

復先減官員勅

王者建設庶官允釐九有量戶口之衆寡定都邑之盛  
衰制其職員約以名數俾吏足成務而下克奉公其有  
弛張必在通濟朕頃緣蕃戎棄信深犯封疆興師備邊  
資用日費而黎人困弊難更徵求遂權減天下州縣官

員姑務集事皆由朕不明不德以至於斯近聞新授官人皆已隨牒之任扶老携幼盡室而行俸祿未請歸還無所嗷嗷道路實疚於懷雖蒸庶之間供應有省而衣冠之弊流寓無依苟便於時豈憚沿革凡百君子所當悉知其先減官員並宜仍舊

賜常叅官錢勅

百辟卿士實惟股肱頃屬艱虞損家徇節累經寇難靡不困窮洎復上京薦遭歎歲官俸既薄公田不收外虧

尊從之儀內懷凍餒之戚朝列尚爾蒸人何堪軫於深  
衷良用愧惻應文武常叅官等宜共賜錢七萬貫姜度  
支據班秩職事及所損職田多少量等級從今至明年  
四月以來隨月支給凡厥多士宜悉朕懷

貞元年

置上將軍及增諸衛祿秩詔

左右金吾及十六衛等將軍故事皆擇勲賢出鎮方隅  
入居侍衛其左右金吾等衛自天寶艱難以後雖衛兵  
廢闕而品秩本高此誠文武勲臣出入遷轉之地宜增

祿秩以示優崇並宜加給料錢及隨身幹力糧課等條  
件處分以優寵功臣令其充給仍舉故事置武班朝叅  
其廂下食等亦宜加給其十六衛各置上將軍一人秩  
從二品左右金吾上將軍俸料等並同六軍統軍諸衛  
上將軍次於統軍支給將求致理必藉兼才文武遞遷  
不令隔限自今内外文武闕官於文武班中才望相當  
者叅叙用仍各依本事於本衛量置衛兵所司即條件

聞奏

貞元年

朝臣薨卒給俸料賻贈詔

君臣之際義莫重焉每聞薨殂深用惻悼宜厚哀榮之禮以申終始之恩文武朝臣有薨卒者自今以後其月俸料宜全給仍更准本官一月俸料以為賻贈若諸司三品以上官及尚書省四品官仍令有司舉舊令聞奏弔祭之禮務從優厚用稱朕懷

貞元十年正月

罷百官正衙奏事勅

朕勵精庶政博求嘉言比者百官正衙奏事至有移時

者公卿庶寮屬當寒暑為弊亦深在於朕意豈謂優禮  
自今勿正衙奏事如陳奏者宜詣延英門請對

貞元元年

### 停河南水陸運使等勅

朕於百執事羣有司方澄源流以責寔効轉運重務專  
委使臣每道有院分督其任今陝洛漕引悉歸中都而  
尹守職名尚仍舊貫又諸道都團練使足修武備以靖  
一方而別置軍額因加吏祿亦既虛設頗為浮費思去  
煩以循本期省事以便人其河南水陸轉運陝府轉運



潤州鎮海軍宣州采石軍越州義勝軍洪州南昌軍福州靜海軍等使額並宜停所收使以下俸料一事以上各委本道充代百姓闕額兩稅仍具數聞奏如聞河南府兩處比來所給皆是置本息利不破工錢勒便添充兩處食錢雜給不要徵納庶我愛人之心豈止於惜費立制之意必在於正名

元和五年

停諸道度支營田使勅

事關軍旅並屬節制務繫州縣悉歸廉察二使所領孰

非管轄諸道度支營田承前各別置使自艱虞以後名制因循方鎮除授之時或有兼帶此職遂令綱目所在各殊今者務修舊章思一法度去煩就理衆心為宜唯別勅置營田處置使且令仍舊其忠武鳳翔武寧魏博山南山東橫海邠寧義成河陽等道度支營田使及淮南度支近已停省其餘諸道並准此處分

元和十三年七月

停宰臣監按詔

元首股肱君象臣類義深同體理在坦懷夫任則不疑

疑則不任自魏晉以降參用霸制虛儀搜索因習尚存  
朕方推表大信寘人心腹庶使諸侯方岳鼓洽化道夷  
貊飛走暢泳性分況吾台宰又何間焉自今以後紫宸  
坐朝衆寮既退宰臣復進奏事其監搜宜停

太和年

### 條貫兩省臺官導從勅

勅憲官之職在指佞觸邪不在行李自大侍臣之職在  
獻可替否不在道途相高並列通班合知名分如宜喧  
競亦已再三既招人言甚損朝體其省臺與供奉官同

道聽先後而行遇途任祇揖而過其從人各隨本官之後少相僻避勿信衝突又聞近日以來應合有導從官手力多者街衢之中行李太過自今以後應有合導從官行李傳呼前後不得過三百步

太和年

釐革選人勅

朝廷懸爵賞之科設掄材之政言其藻鑒在乎清通況當求理之時方切任賢之日將宣至化實賴平衡宜於取捨之間必叶公忠之論如聞羈棲旅食貧苦選人守

數考而方及選期望一官而時希寸祿注唱纔畢旋又  
更移多被逗遛莫遂便穩脂膏之地須因有賄而升遷  
避之官即是孤寒所受言斯猥弊乃積歲年縱有條流  
尋亦隳改況今行在方溥渥恩不欲使嘆惋栖遲吁嗟  
屈滯歸乎允當倚在有司宜令中書門下切在條流如  
選人寔有考課堪理繁劇者臨時注擬可以甄升繫生  
民之慘舒在銓衡之慎擇勿令留滯切速指揮仍將朕  
意宣示百寮及吏部三銓并選人等各令知悉

中和四年二月

文武官參用詔

文武二柄國家大綱東西兩班官職同體咸匡聖運共  
列朝廷品秩相對於高卑祿俸皆均於厚薄不論前代  
只考本朝太宗皇帝以中外臣寮文武參用或自軍衛  
而居臺省亦由衣冠而秉節旄足明於武列文班不合  
清濁優劣近代浮薄相尚凌蔑舊章假偃武以修文竟  
棄本而逐末雖藍衫魚簡當一見而便許升堂縱拖紫  
腰金若非類而無由接席以是顯揚榮辱公別重輕遽

失人心盡隳朝體致其今日寔此之由須議改更漸期  
通濟今文武百官自一品以下逐月所有料錢並須均  
勻數目多少一般支給兼命使諸道亦依輪次差遣既  
就公平必臻交泰叶羣情於天下崇故事於國初凡百

庶官宜體朕意

天祐二  
年四月

唐大詔令集卷一百一



欽定四庫全書

唐大詔令集卷一百二

宋 宋敏求 編

政事

舉薦上

京官及總管刺史舉人詔

採訪孝悌儒術等詔

求訪賢良限來年二月集泰山詔

薦舉賢良詔

搜訪才能詔

河南河北江淮採訪才傑詔

採訪武勇詔

訪習天文厯算勅

訪孝悌德行詔

京文武三品每年各舉所知詔

求猛士詔

訪天下奇才異行制

博採通經史書學兵法詔

文武官及朝集使舉堪將帥詔

諸州舉寔才詔

搜揚懷才隱逸等勅

求訪武士詔

舉薦上

京官及總管刺史舉人詔

擇善任能救民之要術推賢進士奉上之良規自古括  
王弘風闡化設官分職唯才是與然而巖穴幽居草萊  
僻陋被褐懷珠無因自達寔資選衆之舉固藉左右之  
容義在搜揚理歸精確是以貢士有適爰致加錫之隆  
無益於時必貽貶黜之咎末葉澆偽名寔相乖舉非其  
人濫居班秩流品所以未穆庶職於是隳廢朕膺圖馭  
宇寧濟兆民思得賢能用清治本招選之道宜革前弊  
懲勸之方式加恒典苟有才藝所貴適時潔已登朝無

嫌自進宜令京官五品以上及諸州總管刺史各舉一人其有志行可錄才用未申亦聽自舉其陳藝能當加顯擢授以不次賞罰之科並依別格所司頒下詳加

引務在獎納稱朕意焉

武德五年三月

採訪孝悌儒術等詔

朕以寡薄嗣守鴻基寔資多士共康庶政虛已側席為日已久投竿捨築罕值其人自親巡東夏觀省方俗興言至治夕惕兢懷然則齊趙魏魯禮義自出江淮吳會

英髦斯在山川所感古今寧殊載佇風猷寔勞夢想宜  
令河北淮南諸州長官所部之內精加採訪其有孝弟  
淳篤蕪嫻時務儒術該通可為師範文詞秀美才堪著  
述明識治體可委字民并志行修立為鄉閭所推者舉  
送洛陽官給傳乘優禮發遣當隨其器能擢以不次若  
有老病不堪入朝者具以名聞庶嚴穴靡遺俊乂可致

務盡搜揚之道稱朕意焉

貞觀十一年四月

求訪賢良限來年二月集泰山詔

朕遐觀前載歷選列辟莫不貴此得人崇茲多士猶股肱之佐元首譬舟楫之濟巨川若夫構大厦者採衆材於山岳善為國者求異人於莞庫是以陶唐有虞揖讓之聖帝也非元凱不能成茂功商湯姬發革命之明王也非伊呂無以定禍亂況乎齊桓中人之才罷非濬哲漢武嗣業之主志在驕奢猶賴管仲隰朋之用平津博陸之輔既為五霸之長亦稱萬代之宗是知得士則昌失人則亂朕冕旒夙夜虚心政道雖天地効祉宗社降

靈區宇晏如俊乂咸事尚恐山林數澤藏荆隋之寶卜  
築屠釣韞蕭張之奇是以躬撫黎庶親觀風俗臨河渭  
而佇英傑眎箕頰而懷隱淪亟移日月空勞夢寐而驪  
龍莫兆商歌寂寥豈混跡駕駘未逢良樂之顧將毓德  
巖穴不追禽向之遊望雲增想其可歎息可令天下諸  
州搜揚所部士庶之內或識達公方學綜今古廉潔正  
直可以經國佐時或孝悌淳篤節義昭顯始終不移可  
以敦風勵俗或儒術通明學堪師範或文章秀異才足



著述並宜薦舉具以名聞限來年二月總集泰山庶獨  
往之夫不遺於板築藏器之士方升於廊廟務得奇偉

稱朕意焉

貞觀十五年六月

### 薦舉賢能詔

朕遐想千載旁覽九流詳求布政之方莫若薦賢之典  
是以元凱就列仄微可以立帝功管隰為臣中人可以  
成霸業朕緬懷曩烈虛已英奇斷斷之士必升於廊廟  
九九之術不棄於閭閻猶恐在陰弗和獨善難奪永言

髦傑無忘鑒寐是以去夏之中爰動翰墨披霧丹腑疇  
咨海內尺木既樹思覩游露之羣雲羅宏舉佇降翔庭  
之翼而諸州所舉十有一人朕載懷仄席引入內殿借  
以溫顏密訪政道莫能對揚相顧結舌朕仍以其未覩  
闕庭能無戰悚今於內省更以墨對雖構思彌日終不  
達問旨理既乖違詞亦庸陋豈可飾丹漆於朽質假風  
雲於決起者哉宜並放還各從本色其舉主以舉非其  
人罪論仍加一等然則今之天下猶古之天下也寧容

仲舒伯起之流偏鍾美於往代彥和廣基之侶獨絕響  
於今辰故其見知也則平津與樂安並進其不用也則  
敬通與亭伯同悲淮陰所以興言子長所以貽歎因斯  
論之良由俊造難進或固栖遲之節牧宰循常未盡搜  
揚之道撫事長息彌增懽然今州縣依前薦舉皆集今  
冬奇偉必收浮華勿採無使巴人之調濫吹於簫韶魏  
邦之珍沉光於漢水務盡報國之義以副欽賢之懷

貞觀

十年  
二月

搜訪才能詔

高明之天資星辰以麗象博厚之地藉川岳而成形況  
帝王體元立極臨馭萬物字養生靈者乎所以致理之  
君遠讒佞近忠良屈己以申人故能成其化為亂之主  
親不肖踈賢臣虐下以恣情用能成其亂明君遵彼而  
興國暗主行此以亡身是以御朽臨冰銘心自戒宵興  
盥食側席思賢庶欲博訪丘園採搜英俊弼我王道臻  
於大化焉可令天下諸州明揚側陋所部之內不限吏

人其有服道栖仁澄心礪操出片言而標物範備百行  
以綜人師質高視於琳瑯人不間於曾閔潔志於丘園  
揚名於里閭或甄明政術曉達公方稟木鐸於孔門受  
金科於鄭相奇謀間發明畧可以佐時識鑒精通緯才  
堪於幹國或含章傑出命世挺生麗藻道文馳楚澤而  
方駕鈎深覩奧振梁苑以先鳴業擅專門詞成載筆或  
辯調春圃談瑩秋天發研幾於一言起飛電於三寸蓄  
斯奔箭未遂揚庭並宜推擇咸同舉薦以禮將送具表

狀聞限以今冬並與考使同赴庶擬焚林之舉咸矯翼  
於巖廊尺木之階方振鱗於遊霧翹心俊入稱朕意焉

貞觀二十  
一年六月

河南河北江淮採訪才傑詔

朕受命上玄嗣膺下武每肅恭疏冕延想英奇俯振鷺  
而企貞臣仰飛鴻而慕良輔雲臺仄席玉管屢移宣室  
整衣金壺亟改寂寥靡覲鑒寐興懷比年雖常進舉遂  
無英俊猶恐栖巖穴以韜奇樂丘園而晦影宜令河南

河北江淮以南州縣或緯俗之英聲馳管樂或濟時之  
罷價逸蕭張學宰帝師材堪諫輔者必當位之不次可  
明加採訪務盡才傑州縣以禮發遣

顯慶元年十月

### 採訪武勇詔

濟時興國寔佇九功御敵威邊亦資七德朕端拱宣室  
思弘景化將欲分憂俊乂共逸巖廊而比貢英奇舉非  
勇傑豈稱居安慮危之志處存思亂之心如不旌賁遠  
近則爪牙何寄宜令京官五品以上及諸州牧守各舉

所知或勇冠三軍翹關拔山之力智籌百勝緯地經天  
之才蘊竒策於良平馳功績於衛霍蹤二起於吳白軌  
雙李於牧守賞纖善而萬衆悅罰片惡而一軍懼如有  
此色可精加採訪各以奏聞

顯慶二年六月

訪習天文曆筭詔

南正北正司天地之職羲氏和氏統日月之官蓋所以  
幽贊神明發揮厯象經百王而不易涉千古而無替慎  
竈疊跡於前甘石比蹤於後莫不仰稽次舍俯察機祥



克窮盈縮之端備極陰陽之際朕臨御區寓多歷歲年  
睠彼清臺罕聞其妙豈人不逮昔將求之未盡雖天道  
難知固以不言示教而時君取戒寧可遐棄厥司宜令  
諸州及諸司訪解占天文及歷筭等人務取有景行審  
密者並以禮發遣速送所司勿容隱漏

貞元三年二月

### 訪孝悌德行詔

山東江左人物甚衆雖每充賓薦而未盡英髦或孝悌  
通神遐邇推敬或德行光裕邦邑崇仰或學綜九流垂

惟覩奧或文高六義下筆成章或備曉八音洞該七曜  
或射能穿札力可翹關或丘園秀異志存栖隱或將帥子  
孫素稱勇烈委巡撫大使咸加採訪佇申褒獎亦有婆  
娑鄉曲負材傲俗為譏議所斥陷於跡弛之流者各宜  
選擇具以名聞

京文武三品每年各舉所知詔

京文武職事三品以上官每年各舉所知或材蘊廊廟  
器均瑚璉體王佐之嘉猷資公輔之宏量或奇謀異策

決勝千里或投石拔距力冠三軍或蹇諤忠亮志存匡  
弼或繩違糾慝不避權豪或威惠仁明堪居牧守之重  
或公正廉直足膺令長之任咸宜搜訪具錄封進朕當  
詳覽量加獎擢

儀鳳二年  
十二月

### 求猛士詔

朕君臨宇宙司牧黎元普天之下罔不率服蕞爾吐蕃  
僻居遐裔吐谷渾是其隣國遂乃奪其土宇往者暫遣  
偏裨欲復渾王故地義存拯救事匪稱兵輒肆昏迷潛

相掩襲既無備豫頗喪師徒因茲鴟張每思狼顧除兇  
伐叛王者所急前歲將發六軍問其罪戾復以小寇無  
勞大舉按甲息兵庶其改過不思惠養更起回邪敢縱  
狂惑專為寇盜或攻圍鎮戍或驅抄羊馬烽燧頻舉烟  
塵不息候隙乘間倏來忽往比者止令鎮遏未能即事  
剪除莫懷寬大之恩遂長包藏之計惡盈禍稔當自覆  
滅今欲分命將帥窮其巢穴克清荒服心寄英奇但秦  
雍之郊俗稱勁勇汾晉之壤人擅驍雄宜令關西河東

諸州廣求猛士在京者令中書門下於廟堂選試外州  
委使人與州縣相知揀有膂力雄果弓馬灼然者咸宜  
甄採即以猛士為名

儀鳳二年十二月

### 訪天下奇才異行制

朕克纘丕業肇膺景命憲章昔典欽若前王永言政途  
庶幾沿革猶恐學校多闕賢俊罕登庠序者風化之本  
人倫之先宜令州縣勸導令知禮讓天下有奇才異行  
者沉伏不能自達及官人有能極言時政得失並令本

州具狀封進鄉飲之禮廢日久宜令諸州每年遵行

鄉飲之禮

唐隆元年七月

博採通經史書學兵法詔

才生於代必以經邦官得其人故能理物朕恭膺大寶  
慎擇庶寮延佇時英無忘終食思欲蕭艾咸採葑菲不  
遺而商山幽僻渭濱寂寞夫以貴耳賤目殊通方之論  
捨近謀遠非應務之術今四方選集羣才輻湊藻斧伐  
柯求之不遠其有能明三經通大義者能綜一史知本

末者通三教宗旨究精微者善六書文字辨聲象者博  
雅度曲和六律五音者韜畧孫吳識天時人事者暢於  
詞氣聰於受領善敷奏吐納者咸令所司博採明試朕  
親擇焉

景雲元年  
十二月

### 文武官及朝集使舉堪將帥詔

將帥之任軍國斯重禦侮扞城良才是急頃者武臣多  
闕戎政莫修聆鼙鼓以載懷筮熊羆而未遇古今一也  
何代無人南仲方叔之儔亦在用人而已宜令文武官

及朝集使五品以上各舉堪將帥者一人明敎幽仄無

限年位務求寔用以副予懷

先天元年十二月

諸州舉實才勅

致化之道必於求賢得人之要在於徵實頃雖屢存責  
帛無輟翹車而駿骨空珍真龍罕覲豈才之難遇將舉  
或未精且人匪易知取不求備瑰琦失於俗譽韜晦嗟  
於後時宜其博詢州里明敎幽仄使筦庫無遺邁軸咸舉  
其諸州有抱器懷才不求聞達者命所在長官訪名奏



聞武勇者具言謀畧文學者指陳藝業務求實用以副

予懷

先天二年六月

搜揚懷才隱逸等勅

勅立政之本惟賢是切朕祗膺天歷殷監遠圖揚於王  
庭生此王國朕之所望久矣豈微辟為事未極於岩藪  
而高尚絕塵見遺於草澤將何以舉逸而勸賁然來思  
且才之或偏猶器不求備故非臧文之智則尚其言收  
曲逆之奇則捐其行過而能改仁遠乎哉天下諸州有

懷才隱逸跡弛不調及失職寃人等事並令諸道檢察使博訪具以名聞副朕飢渴之懷庶廣搜揚之義

先天二年

十一月  
四日

### 求訪武士詔

武設五兵所以安人禁暴臣稱三傑所以戰勝攻取蜀乃一方之主尚得孔明齊為九合之君斯由管仲況宇宙至廣人物至多豈乏英賢無聞韜畧益用與不用知與不知今邊境未清統邊須將項林胡暫擾柳城非捷

北虜忽驚西軍莫振罪由失律過在無謀曹劌不言寧  
知登軾之効淮陰非薦孰膺推轂之勲長想古今是思  
擢用恐雖霜簪紱猶晦迹於下流或蘊智謀尚沉名於  
大澤不加精訪何以甄收其兩京中都及天下諸州官  
人百姓有智合孫吳可以運籌決勝有勇齊賁育可以  
斬將搃旗或坐鎮行軍足擬萬人之敵或臨戎却寇堪  
為一隊之雄各聽自舉務通其寔仍令州府具以名進  
所司速立限期隨表赴集朕當親試不次用之其有身

見在諸軍統押者但錄所能奏聞未須赴集

開元九年九月

唐大詔令集卷一百二

欽定四庫全書

唐大詔令集卷一百三

宋 宋敏求 編

政事

舉薦下

詔天下搜賢俊制

訪至孝友悌詔

處分舉薦人詔

令常叅官舉人詔

搜訪天下賢能勅

搜訪兵術賢才詔

按察上

遣使巡行天下詔

遣十使巡察風俗制

處分朝集使勅八道

舉薦下

詔天下搜賢俊制

賈至

朕聞惟理亂在庶官是以先王旁求俊彥思皇多士以  
倡九牧阜成兆人頃者奸臣執權專利冒寵惟正直是  
醜惟邪佞是能此壅塞賢路罔蔽天聽使忠臣不得進  
其謀才士不得展其用廢三載之黜陟寢九德之推擇  
多有老於郎署滯於丘園吏稱無人才不給位朕以薄  
質嗣守大寶冠戎未殄王業維艱兢兢乾乾日慎一日  
緬惟堯舜求賢之意周公吐握之義思欲廣進髦乂輔

寧邦家寔賴公卿大夫弘我視聽易曰方以類聚語曰  
舉爾所知凡宰相王臣宜加搜擇其常叅官及郡縣長  
吏上佐等皆從歷試而踐通榮如各知其密行異能博  
學深識才堪濟代術可利人名不彰聞位不充量湮淪  
屠釣流落風波者一善可錄便宜公舉遠則封表附驛  
近則進狀奏聞勿避親讎無限儕伍其有獨負奇才未  
逢知己即仰投匭并所在陳狀自論長官登時與奏夫  
茲薦士非止一舉永為恒典有即登聞昔荀桓子立翟



之功士伯受瓜衍之邑柳下惠賢而不舉臧文仲被竊位之名春秋書之千載不朽凡百在位可不勉歟宜宣示

中外令知朕意

至德二年四月八日

訪至孝友悌詔

至和育物大孝安親古之哲王必由斯道朕往在春宮嘗事先后問安靡闕侍膳無忘及同氣天倫聯華隸萼居嘗共被食必分甘今皇帝奉而行之未嘗失墜每有銜命而來戒途將發必肅恭拜跪涕泗交連左右侍臣

罔不感動聞者旭日抱戴瑞亦自天白狼之瑞接武薦  
臻此皆皇帝聖敬之符孝友之感也故能誕敷德教弘  
乎四海信可以光宅寰宇永綏黎元者矣其天下有至  
孝友悌行著鄉閭堪旌表者命縣長官採聽聞奏孝子  
順孫樂於立化也

至德二  
年正月

處分舉薦人詔

推薦之道必務於至公賞罰之間亦資於不濫其諸色  
舉人等須有處分令薦所知寔佇才能用施政理自宜

慎擇以副虛懷古者効官三歲考績善惡既著褒貶斯存舉之得人必受旌能之賞舉之失選亦加懲過之罰賞罰之典期於勉行凡百具寮宜知朕意

寶應元年七月

### 令常叅官舉人詔

勅知人則括堯舜猶難類能而舉古今常式自頃中原多故汙求小康州縣屢空守宰多闕攝官承乏者頗無舉職之能懷才抱器者或有後時之歎朕所以宵衣不寐側席未遑思弘致理之規冀及大中之道而庶尹卿

士備列朝廷豈無叶贊之心以助旁求之義其内外文武官如有堪任刺史縣令及出身前資人中堪任判司丞尉者宜令京常叅官各慎擇所知具狀奏聞及諸州刺史縣令既藉寮屬宜亦准此古者得人受賞速不踰時增秩賜金有國通典其或任非稱職舉不當事顧多附下之心亦無不適之罰其所舉人受官後如政事尤異清白著聞三兩考後仰本道觀察使聞奏其舉主及所舉人並量加進改如懦弱不舉及暴政處置乖宜并

冒犯賊私等罪論刑當亦連坐宣示中外知朕意焉

寶歷

元年  
九月

### 搜訪天下賢能勅

濟國安民兼先得士懷才抱器所切逢時苟獲賢能何  
難任使自從近歲頗乏豐年百姓凋殘四方空竭邕交  
防戍邛蜀征行租賦罄於東南衣糧耗於西北欲全國  
力須整邊防所恨利於國者或迷之而未行害於人者  
或遣之而未去天下有洞諳邊事深會兵謀或決勝於

干戈或運籌於帷幄及有苦心吏術深達政經曾觀已  
試之能可致必成之理各仰自見所在長吏先共討論  
有可取者發遣赴京量事資送或安貞守道隱遁山林  
或勤學知書博通今古並仰所在長吏搜訪聞奏冀有  
才者得伸有能者得用凡思報國無若薦賢如得非常  
之材必加不次之賞布告天下知朕意焉

搜訪兵術賢才詔

朕每念艱難之本切思拯救之圖治少亂多古猶今也

蓋搜揚之未至非爵賞之不行況自鄉里沽虛物情賈  
怨朝市有爭先之黨山林多獨往之人彼豈自窮驅而  
莫返其有文包經緯道貫儒玄貞遁自肥浮名不染豈  
無加等之爵以待非常之流今委使臣遠近徵訪必行  
備禮以聳羣方且機貴研深用惟體要運當無事固垂  
拱而可待時屬多虞非援奇而不振或有材優將畧業  
洞兵鈴辨勝負於風雲計短長於主客妙得神傳之訣  
耻成兒戲之名不俟臨機方期制變或銷聲於屠釣或

屈志於風塵勿媿自媒當期致用至乃旁窺國病動適  
時宜深探貨殖之源備得富強之術排於浮議鬱彼良  
圖又有志擅縱橫久潛緇褐材推超異見辱儕流苟全  
一藝之工不必萬夫之敵亦有推研歷象校步星辰言  
必効於機先術豈疑於億中是資竒器孰曰異端亦在  
勤求佇加殊賞噫功名可慕少壯幾何在君親則忠孝  
相資於國家則安危同切勿甘流落猶狗彘安並委使  
臣勝示訪求長吏津置發遣同心體國無使淹延懸賞



俟能必期升擢朕雖踵艱否亦謂憂勤高祖太宗之在天固當垂祐社稷生靈之有主夫豈乏賢達我數求咨爾將命勿虛翹矚苟自因循其間儒學優游軍謨弘遠密陳時務願就制科者已從別勅處分跡弛遺才沉淪末位不礙文武並須升聞布告天下咸使知悉

光啟五年五月

### 按察上

### 遣使巡行天下詔

昔者明王之御天下也內列公卿允釐庶績外建侯伯

司牧黎元唯其淳化未敷名教或替故有巡狩之典黜陟幽明存省方俗遐邇遂性情偽無遺時雍之宜率由此道朕祗膺寶命臨御帝圖稟過庭之義方荷上玄之嘉祉四荒八表無思不服而夙興夕惕勤躬約已日慎一日雖休勿休欲萬國歡心兆民有賴推誠待物近取諸身實謂羣官受拜咸能自勵乃聞連帥刺舉或乖共治之寄縣司主吏尚多黷貨之罪有一於此責在朕躬是用中夜憊然景輟食宜遣大使分行

四方申諭朕心延問疾苦觀風俗之得失察政刑之苛  
弊耆年舊齒孝悌力田義夫節婦之家疾廢惇嫠之室  
須有旌賢賑贍聽以倉庫物賜之若有鴻材異等留滯  
末班哲人奇士隱淪屠釣宜精加搜訪進以殊禮務盡  
使乎之旨俾若朕親覲焉

貞觀八年正月

### 遣十使巡察風俗制

古之御天下者以大寶為公器以崇高為外物仰則乾  
符順性命之理俛思坤載成厚博之德將以治成至道

保邦靜人用清三徵以齊七政能臻夫此者豈一人之力哉寔賴羣方共康庶績自季葉淪替佞棄公道官匪其人教無所習懷才修潔者則依違以自容通方宏偉者則放蕩以求利由是淳化日削澆風歲長典章訛弊眊俗凋殘逶迤陵頽莫能振理朕以薄德丕承寶命夙夜惟寅憂勞無怠昧旦端冕心被褰瀛日晏罷朝念周黎庶頃者勵精推擇傍求牧宰冀聞善政惠康乃人虛已勵勤美化猶怠貪官傲吏屢黷於爰書失職流亡幾

淪於版籍豈刑賞之柄不叶其中將宵旰之誠未孚於  
下永言國本良深軫悼古者天子巡狩省方觀俗而錫  
鑒備駕或以為煩故分命輶軒博採謠誦以彰善癉惡  
激濁揚清散皇明以燭幽揚仁風以被物寔資令德允  
屬通才惟懷永圖式鑒成憲宜於左右臺及內外五品  
以上官識理通明立性堅白無所詘撓志在澄清者二  
十人分為十道巡察使二周年一替以廉按州部俾其  
董正羣吏觀撫兆人議獄緩刑扶危拯滯若能抗詞直

筆不憚權豪仁恕為懷黜陟咸當別加獎擢優以名器  
如脂韋苟全蘧蔭咸施高下在心顧望依附者將遷削  
屏棄肅以憲章咸竭迺心以副朕意

神龍二年二月

處分朝集使勅八道

蘇頲

勅朝集使等朕自臨萬邦修己三載何嘗不兢兢業業  
勵精政道思欲棄末敦本阜俗安人寰瀛之間日月以  
冀所以急於務農不奪人時富而教之庶乎可致夫苛  
政甚於猛虎貪人比之強賊頃雖臨遣使臣未能澄正

此弊或刻以害物或擾以妨農或背公向私或全身養望至使錢穀不入杼軸其空捐瘠相仍流庸莫返且四方事廣非一人獨化共理之寄非鄉而誰鄉等至州遞相勗勵勤恤孤弱勸率耕桑各効清勤無或隳怠

開元三年

二月十五日

又

勅朝集使等朕聞御寰瀛者不可以獨化養黎獻者必存於共理故專一方親百姓能致循良之術必無愁苦

之聲非牧伯之賢疇能於此所以精求臺閣歷選縉紳  
當舉百寮之要以先六刺之重虛想隹政用成庶績自  
去冬入計者則循名責寔詢事考言雖不無等差終未  
有殊異得非歲時或淺風教未洽耶故一切不除各再  
臨所典至於敬耆老恤羸弱止姦盜挫豪強人不忍欺  
吏不敢犯田疇墾闢獄圜空虛徭賦必平逋逃自復門  
杜請謁庭無滯留若是者迺關乎職思可以力致至於  
弭災眚集休祥尚德義崇禮樂儒風大長道化滂流耕



夫克讓織婦知節草木不夭昆虫咸遂扇彼淳源登茲  
壽域若是者亦弘之在我仁遠乎哉豈惟祿秩就加以  
公卿入拜其或靡副朝獎不恭朕言陟既有之黜故宜  
及勉旃俞往各勤我班瑞之分命

開元六年  
二月六日

又

勅朝集使朕聞天生蒸人溥於四海天有成命孚於萬  
邦必內立公卿外建侯伯后非賢罔使賢非后罔事借  
耳以廣聽假目以遐覽則諭上旨通下情庶政諧而羣

萌樂矣由是三考黜陟百官會同古昔之訓炳然共  
守朕以薄德祇膺寶位受乾坤之顧荷宗廟之靈懍乎  
若涉春冰如馭朽索責在司牧所賴分憂曷嘗不想望  
賢才馨香至化七年於茲矣咨爾羣岳寔邦之良服勤政  
途深佇嘉績豈為吏罕久與人未信何殊尤異絕寂寥  
厥聲恭惟永圖當副虛屬孔子曰苟有用我者三年有  
成漢宣曰庶人安田里無愁恨之聲者政平訟理也以  
為太守數易則下不安誠哉是論矣今之牧守古之諸

侯寵數特加情寄尤切故躬饗廷內則飲食晏樂幣帛  
筐篚入至朕前則敷衽以陳命席而對所冀仁且不遠  
言之必行以朕憂勞之心託卿勤卹之助卿等宜慎厥  
始成厥終往欽哉祇守爾典操一州之統分六條之察  
念茲在茲用光我班瑞之命有賞有罰朕無戲言並即

好去

開元七年三月十一日

又

勅朕自君臨區域子育黎庶歲年是慎夙夜惟寅而誠

或不孚政猶未洽所在旱澇屢覩章表因饑饉而為理  
竭憂勞以養人非夫二千石孰應斯委下戶給之高戶  
貸之所須賑恤並先處分至於常賦則著恒典檢據成  
損蠲減有條又近日以來中外少事差科調發殆至於  
無處馭通融當免於弊不知卿等從州來日百姓間得  
以安穩否其閭閻未便勅令有關具以陳聞副我深寄  
時寒涉路並平安好其三兩日尋親識後取曹司進止

開元七年

十月二日

又

勅朕聞諸禮曰刑禁暴爵舉賢則政均矣好惡著則賢  
不肖別矣其道然耶朕以虛薄祇膺景命荷宗社之靈  
當億兆之責曷嘗不昃朝晏坐畏天愛人思欲保其和  
樂躋於仁壽則與我共理者其惟良二千石乎每計吏  
還州與之陞見示其賞罰餞以筐篚亦云命而已矣而  
朝集使豫州刺史裴綱分典荊豫為政煩苛頃歲不登  
公議蠲復部人有訴便致科繩縣長為言仍遭留繫御

史推按遽以寔聞虐政弊人一至於此朕夙夜乾惕匪  
遑寧居尋遣使存問其諸道有損處已量加賑恤水旱  
不時寔朕之過惠養失所分刺之由是用黜綱於嶺裔  
儆彼羣岳朕於蒼生若保赤子為之均田邑制廬井必  
欲其時和年登遠安邇肅託於牧宰代以躬親故歷難  
其官誠經國致理之意也夫德惟善政政在養人故土  
煩則草木不長水煩則魚鱉不大必也寬恕貴乎清靜  
諸刺史都督宜問疾苦拯貧窮杜侵漁察冤獄至於賦

役務從減省深刻為事人何以堪私惠苟行法或將墜  
理須折衷用存令式其百姓有穩便者隨事條奏將親覽  
焉欽爾有官各勤為政如風化允穆課績殊尤當擢之  
不次旌乃厥美凡百庶邦敬聽朕命

開元八年二月十九日

又

勅朝集使古者覲羣后比萬國黜幽陟明循政思理罔  
或廢也朕以虛薄屬當期運受命穹昊司牧黎元何嘗  
不中夜求衣分晝忘食欲其日月所燭霜露所墜不獨

親其親不獨子其子五穀豐殖萬物阜安百姓無事與能  
共化於茲八年矣而淳流未還至道猶鬱豈朕之不德  
邪將吏之不賢耶徭賦或繁耶綱維或紊耶故延入階  
陛躬問得失悉如卿所對則朕無憂矣書曰非知之難  
行之惟難語曰仁遠乎哉我欲仁斯仁至矣卿等宜祇  
典厥職克正其身修於國章允茲朝寄因乎風俗示之  
訓誘必也道德齊禮以公減私田里絕愁歎之聲邦家  
聞寬厚之化乃及優賞如或依勢作威倚法以削流亡



未至教令不行加以常罰自餘宜依別勅處分勤恤人  
隱以副朕懷並仰好去

開元八年三月十一日

又

勅朝集使等朕承天丕命子育萬方樹之師長俾敷景  
化將以固茲邦本致諸昇平而大道緬然淳風未暢租  
賦頗減戶口猶虛水旱相仍耕桑莫贍蓋朕之不德而  
吏之無方永言於茲良增歎息往歲河南失稔時屬薦  
饑州將貪名不為檢覆致今貧弱萍流外境責在致理

有從貶黜因茲以來率多妄破或式外奏免或捐中加數至如密州去秋奏湯管戶二萬八千八百不損者兩戶而已無田商賈之流雷同入數自餘州不損戶即丁少得損戶即丁多天災流行豈應偏併皆是不度國用取媚下人曩之刻薄也如彼今之踰濫也如此不副朕意一至於斯踈怠之愆雖已會赦尸曠之跡豈不多慙當令所司比類澄汰卿等與朕共理寔惟分憂各勉思政途以匡不逮其百姓間事物去冬赦書已處分訖若

人有疾苦鄉有姦豪不勤農桑不崇學校並宜敦勸以  
正風俗逃亡之戶必藉招携差科之間務令停減如臺  
省處事有不穩便於時者具利害聞奏勿復依隨以損  
百姓卿等至州之日宜一留意綏我庶人並即好去

元開

十年正月  
十一日

又

勅朝集使等朕臨寓內子育黎元何嘗不簡易愛人勤  
卹庶政天下至廣不能獨任故樹之方牧資其共理而

淳化未敷至道猶斂庸賦未減戶口且虛水旱相仍倉  
儲莫贍無聞慈惠之政未息凋弊之流豈朕之不明而  
吏之無術言念於此用惻於懷卿等是行勉思厥政百  
姓間有鰥寡惸獨不能存濟者務令優養游業浮惰不  
勤稼穡者特令懲肅敦以學校勸以農桑差科之間務  
使平允逃亡之戶蕪藉招携令其下人使得蘇息諸州  
遭溺之處多是政理無方或堤堰不修或溝渠未洩頻  
已處分竟無承稟當被租庸是何檢校至州之日各宜

勸勉應合修塞開導宜預施功若不斲勞何以獲利今  
令御史分知訖宜勵所職勿犯常科今考績深者已有  
除改資歷淺者更佇良能應還州人已令所司各與賜  
物待駕發後三五日別親識並即好去

開元十年二  
月二十七日

唐大詔令集卷一百三